

مؤسسات خاصة

استمارة مسرحية

اسم المسرحية : افتح يا سمسم * مسرحية رقم (١٦)

تأليف : وداد عبد اللطيف الكواري

إخراج : فالح فايز

إنتاج وتقديم : مؤسسة الفدير

مكان العرض : مسرح قطر الوطني * مسرح التربية

تاريخ العرض : ١٩٩٦/٩/٢٠ * ١٩٩٧/٤/١٧

عدد العروض : ٣١ عرض * ٧ عروض

عدد الرواد : ١٣١٦٩ متفرج * ٢٤٥ متفرج

ملاحظات : * افتح يا سمسم مسرحية للأطفال

* المسرحية عرضت على غتر شبرا

* مجموع العروض (٣١) عرض - مجموع الرواد ١٥,٦١٩ متفرج

بسم الله الرحمن الرحيم
وحدة التوثيق

عدد ١٤٤٤ - الاربعاء ١٤٠١ / ٤ / ١٩٩٤
السلامة يا صفاً .

بسم الله الرحمن الرحيم

مسرحية

الأطفال الغنائية الاستعراضية

افتح يا سمسم

تم تقديم هذه المسرحية على خشبة مسرح
قطر الوطيف بدأته اول ايام عيد الفطر ١٤١٦ هـ
الموافق يوم الثلاثاء ١٩٩٦ / ٩ / ٢٠

تأليف
اخراج خالد فايز

وداد عبد اللطيف

إعادة لفرقة المسرحية على خشبة مسرح الترسيم
مناسبة عيد الاضحى ١٤١٧ هـ الموافق ١٩٩٧ / ٤ / ١٧

الفصل الأول

المسرح مسدل الستائر ومع بداية أغنية الإفتتاح تظهر مجموعة أطفال أمام الستارة ويرتدون ملابس سوداء وأقنعة سوداء وعلى قمصانهم تشع الأحرف باللون البرتقالي: أ - ف - ت - ح - ي - أ - س - م - س - م « عنوان المسرحية » ثم يتفرقون بعد أن تفتح الستارة ونستكمل الأغنية مع الشخصيات الأخرى : أنيس + بدر + نعمان + أبله منار +
الشخصيات المكملة : القط مبروك + بهلول المهرج + عدد (٢) رجال آليين + جاسم + غانم .

ديكور المسرح مقسم دون حواجز الى عدة أقسام (مدرسة - منزل - شارع . أو يتم إدخال قطع الديكور فيما بعد - نوافذ البيوت تطل على الشارع ، ألوان الجدران والنوافذ زاهية ومشعة وكذلك الملابس)

كلمات

الأغنية الأولى

أ - ف - ت - ح - ي - أ - س - م - س - م
افتح يا سمسم افتح افتح خلينا نمرح

((يدخل جاسم وهو مرتديا شورت طويل وقميص وحذاء رياضة ومن الطرف الآخر للمسرح يدخل الباعة ، بائع جرايد + بائع بالونات + بائع الكلينكس . وكل واحد ينادي على بضاعته)) .

جاسم : يا الله صباح خير ، بدى الازعاج اليومي !!
 بائع الجرايد : هاذي عمل ، شغل ، مب ازعاج !!
 جاسم : محد حاجاك انت يابولسان
 بائع : وأنا بعد ما حاجيتك يا الكسلان ..
 جاسم : باستغراب ... يه

((البائع يذهب بعيدا وهو ينادي على الجرائد وانيس يتلفت حوله))

جاسم : وينهم ذوله ... تأخروا .. يامقدام .. يا حسام ... وينكم لا بارك
الله فيكم . تعال أنت تعال .
 بائع البالونات : تكلمني !!
 جاسم : لا اكلم ظلك .. ايه اكلمك تعال !!
 بائع البالونات : ما فيه لو سمحت والا من فضلك !!
 جاسم : اقول لك انت لو سمحت ومن فضلك .. اشله . من تكون أنت !!
 بائع البالونات : انسان .. ولي مشاعر وأحاسيس مثلك بالضبط !!
 جاسم : اسمع عاد اذا بتقعد تهذر وتضيع وقتي ووقتك بكلام ما له معنى
 باغير رأيي ومب واخذ منك ولا نفاخه .. وخل النفايخ في جبدك
 بائع البالونات : كم وحده تبي .

جاسم : هاتهم كلهم ... « يستلمهم منه ويطيّرههم بفرح » ياسلام شكّلهم
حلّو وهم في الجو .. أحرار .. « يصفق » افتكو من ويهك ومن
لسانك !!

بائع البالونات : الحساب ٥٠ ريال !!

جاسم : حساب وشو !!

بائع البالونات : حساب البالونات !! بعد شى حسابيه !!

جاسم : أنا ماخذت منك شي .. حاسب الجو !!

بائع البالونات : جو ف عاد ، اناها لغشمة ما أحبها ، أنا ريال وراي عيال
ومسؤوليات !! هات الفلوس هات !!

جاسم : يعني هالخمسين ريال هي اللي بتحل مشاكلك !!

بائع : مالك خص بمشاكلي ، أنا اشتغل عشرين شغلة في اليوم والحمد لله ،

الله فاتحها علي ... المشكلة مب في الفلوس ، الرزق عند رب
العالمين .

البائع : المشكلة في نوعية الناس اللي تعامل معاهم .. الناس اللي ما عندهم

سالفه ولا منطق أمثالك هات فلوسي هات « يمسكه من
قميصه » .

جاسم : زين ييه باعطيك فلوسك .. هدني لا تخرب كشختي !! يا حسام

.. يامقدام .

((يدخل الرجلان الآليان في يد أحدهما حقيبة كتب كبيرة وفي يد الآخر حقيبة

صغيرة))

الآليان يغنيان :

احنا الخدام نمشي لقدام
خطواتنا بطيئة وموزونة
ما نعرف الآه ولا كلمة لا
وخدماتنا جيده ومضمونه

جاسم : بس بس مع هالأصوات اللي تجيب الويعه ، الف مره قايل لكم
تردون باقتضاب !!
البائع : وشو اقتضاب !!
جاسم : مب شغلك ، انت لك فلوسك وس !! عطوه خمسين ريال !!
مقدام : اقتضاب يعني اختصار !
حسام : تفضل هاذي خمسين ريال !! « صوت مبرمج »
البائع : مشكورين .. « وهو ينصرف » خدامك يعرفون الأدب والأصول
أكثر منك .
جاسم بغضب : انصرف .. اذهب .. انجلع .. لا بارك الله فيك !! فورلي دمي على
الصبح !!

((مقدام يفتح الشنطه ويناوله علبة عصير ويشرب منها جاسم مع دخول أنيس
ويدر ويد كلا منهما شنطه صغيرة))

جاسم : أف الف مرة قايل لكم لا تعطوني عصير بارد !! تبون تعورون
بلا عيمي !!
((يناوله حسام عصير آخر))

- جاسم : وهاذي وايد حار تبون تحرقون بلا عيمي !! ابغي عصير نصه بارد
ونصه حار !!
- حسام : بسيطه صب من ذيه على ذاك وتحصل على طلبك !!
- جاسم : تنكت انت .. مخصوم منك نص شهر !!
- حسام : حرام عليك أنا .. فقير ... مسكين !!
- أنيس : هيه بدر !! بدر !!
- بدر : ماذا تبني يا أنيس !!
- أنيس : بدر ! بدر !
- بدر : ماذا تبني يا أنيس ، لا تسندر راسي كالعادة !!
- أنيس : هل تظن أننا تأخرنا عن المدرسة !!
- بدر : كلا ، لا زال الوقت مبكرا !!
- أنيس : ربما نكون قد تأخرنا !!
- بدر : قلت لك لم نتأخر !!
- أنيس : حسنا ، افترض اننا تأخرنا .
- بدر : لا داعي للإفتراضات مدمنا لم نتأخر !!
- أنيس : ولكن من الممكن أن نكون قد تأخرنا .
- بدر : انيس لا تثير أعصابي بهذه الأسئلة !!
- أنيس : بدر !! انظر الى الساعة ، نحن قد تأخرنا فعلا ، اليس كذلك !!

((بدر ينظر لساعته ثم يرمي حقيبة بغضب))

بدر : نعم تأخرنا والسبب أسئلتك الغبية !!

((يدخل نعمان وهو يركض يصطدم بجاسم ويقعان معا ويهب الخدم لمساعدة

جاسم))

- جاسم : عمي أنت ما تشوف جدامك !!
- نعمان : أنا نعمان !!
- جاسم : ندري انك نعمان وخير يا طير ، من رشاقتك انت الحين عشان
تركض وتدعم الناس .
- نعمان : امارس رياضة الصباح .
- جاسم : والله لو تمارسها بامك وابوك مب ضاعف .
- بدر : لا تجعله يفقد الأمل يا جاسم !!
- نعمان : أنا حزين
- جاسم : احزن من نشاد عنك !!
- أنيس : هيه بدر يبدو أننا تأخرنا عن المدرسة .
- بدر بغضب : أنيس !!
- أنيس : « بهدؤ » بدر !!
- بدر : لا تخليني أفقد اللي بقى من أعصابي يا أنيس !!
- انيس : وأنا اش سويت يا بدر !!
- جاسم : يا أخي انت ليش صاك عليه عطه فرصة يسأل ويتعلم .
- بدر : بس هو ما يسئل أسئلة مفيدة ، أسئلته كلها مكررة وما لها معنى .
- جاسم : أشدعوه لو سئل أسئلة مفيدة على قولتك بتعرف تجاوب ، من حسن
حظك ان اسئلته تتناسب مع مستوى فهمك وتفكيرك .
- نعمان : بسك طنازه عاد ، أنت من فاكر نفسك ، كله تتطنز وتعيب !!
- جاسم : هاذيه من يكلم !!

- نعمان : اكلمك أنت ، محد عاجبك ولا حد مالي عينيك .
 جاسم : سكتوه قبل لا اتصرف تصرف تدمون عليه كلكم !!
 بدر : تعال يا نعمان هاذيه على طول جذيه !!
 جاسم : أش قصدك بهالكلام .. هاه ..

((يدخل غانم وييده حبل يسحبه باعيا))

- أنيس : الا تعتقدون أننا تأخرنا على المدرسة .
 جاسم : أيه تأخرنا ، أش تبني أنت الحين مع هالويه .
 غانم : جذيه تسوي فيني ياجسوم !!
 جاسم : أحترم نفسك ياغنوم !! أنا اسمي جاسم .
 غانم : وأنا غانم وكله تقول لي غنوم ومب هاذيه موضوعنا .
 جاسم : ما بين وبينك مواضيع .
 غانم : بلى ... فيه ، أشلون تاخذ الخدم وما تخلي واحد يشيل عني
 الشنطة .
 جاسم : قول حق الوالد يجيب لنا خدم زيادة .. هالاثنين ولبهم لي .
 غانم : قلت له قال لي جب وعن المساخه هاذوله مايشغلون ببلاش .
 جاسم : وعطاك درس عن الكفاح والمسؤولية ومادري وشو .
 غانم : بالضبط ، أش دراك !!
 جاسم : أعرف الوالد ، كلامه دايم كبير وما منه نتيجة . ووين شـنـطـتـك
 عيل !!

((غانم يسحب الحبل في طرفه نجد شنته مربوطة))

- أنيس يصفق : هيه بدر .. انظر غانم اصطاد شنته !!
- نعمان : غانم مب كفو يصيد نحلة ، هاذيه يسمونه كسل واتكاليه !!
- غانم : اشبلاه ذيه !!
- جاسم : خله يولي هاذيه من الصبح وهو معتفس ويقول كلام يــــدل على الحسد والغيرة .
- نعمان : أحسدك على وشو واغير منك على وشو ... انت واخوك اكبر منا وكنتو سابقينا بجم صف واحنا الحين صرنا معاكم وينجح وينتركمم في نفس الصف .
- غانم بحزن : صاج .. صاج يا جسوم
- جاسم : ما عليك منه يا غنوم أنا باقول حق الوالد يجيب لنا خدم يعرفون انكليزي وعربي ويتجوف ان ما تفوقنا عليهم .
- بدر : وهل هذا هو الحل !!
- نعمان : والخدم بيقدمون امتحان بدالكم اذا فرضنا انهم ساعدوكم حتى في الامتحانات هم بيشتغلون عنكم في المستقبل واذا فرضنا واشتغلوا بعد من يستحق الراتب الي يشتغلون والا القاعدين عاله على المجتمع .
- غانم : جنه قام يخورها
- جاسم : وهو خايرها من زمان محترمنا لأنه فقير وما عنده خدم وحشم .

((انيس يقلب الشنطة « شنطة غانم باهتمام »))

- أنيس : هيه بدر مانوع هذه السمكه !! أقصد هذه الشنطة .
- جاسم : اسمه انت يانعمانوه ... أبعد عن طريقنا بتاتا .. تراني احذرك أي
ام ورننج يو .. فاهم !!
- غانم : ايه نعم .. أنا بعد أي أم و ... و « مرتبكا » مثل ما قال .
- جاسم : الناس العدلين ... الي يعرفون السنع ويفهمون في الأصول ما بيدون
يومهم الا بالكلام الحلو .. الكلام الجميل ... الكلام الي يفتح
النفس للحياة .
- غانم : ايه صحيح .. صحيح ياجسوم
- جاسم : « من بين اسنانه » قلنا جاسم ياغنوم .
- غانم : تقول لي غنوم باقول لك جسوم ... ومب ذيه موضوعنا .
- جاسم : وشو موضوعنا يالده .
- غانم : أنا من وصلت ومحد فيكم قال لي كلمة حلوه .. كلمة طيبة ...
حتى صباح الخير ما سمعتها من حد .
- جاسم : ولا تزعل باقول لك صباح الخير ... يامدلقم !! صباح الخير
« يغنيها » .
- نعمان : صحيح .. حقك علينا .. مفروض ان احنا نبدأ نهارنا بتوقع الخير
حق بعضنا بعض .
- بدر : صباح الخير !!
- انيس : صباح الخير
- الجميع : صباح الخير ..

((ثم بداية الأغنية « صباح الخير »))

((يشارك الباعة والجميع في استعراض الأغنية ومع نهاية الأغنية نسمح بوضوح جرس المدرسة ثم يتراكم الجميع نحو نهاية المسرح حيث يضع كلا منهم مقعده .. وطاولة صغيرة ولوحة معلقة للكتابة عليها))

جاسم : به تأخرنا يا شباب !!
 بدر : هيا بنا .. هيا !!
 انيس : هيه بدر هل تعتقد أننا تأخرنا عن المدرسة !!
 جاسم : وأحنا شنقول من الصبح .. هاذيه صج يجيب الضغط !!

((يجلسون جميعا على المقاعد ويقف الآليان خلف جاسم مباشرة وجاسم يمد يده دون أن يلتفت يناوله أحدهما سندويتشا مع دخول القط مبروك الذي يصدر صوت مواء))

جاسم : بل هاذيه يجي على الريحه ... لا تقرب مني ما اداني اشوفك
 شواربك تضيق خلقي

القط مبروك : أنا مب ياي لك أنا ياي أحضر الحصة وأستفيد !!
 غانم : شي عجيب يا اخي الكل طلع له لسان حتى القطاوه صاروا أشرار .
 القط : أنا مب شرير ، أنا أدافع عن ذاتي .

جاسم : يللا خذ ... يقول لك يدافع عن ذاته .. أي ذات ... السفلى ولا

العليا .

- نعمان : تتطنز عليه ليش .. مبروك قطو واعى ويغى يثقف نفسه .. هاذيه
عيب والا حرام !!
- جاسم : هاذيه قطو ... اشله يثقف نفسه .. ايه ايه ... فهمت يبي يتعلم
طرق جديدة ييوق فيها !!
- القط : أنا ما ابوق أنا القط رزقي .
- جاسم : تلقط رزقك بالبوق من بيوت الناس .
- غانم : بس عاديا يا جاسم صكيت عليه
- القط : « بحزن » لا خله يقول هو معاه حق ... أنا نصيبي جزيه ، وما
عندي خيارات ، مضطر اعيش على حساب غيري ، « ينتفض
فجأة » لكن اظل احسن منك !!
- جاسم : هاه !!
- القط : ايه نعم ، أنا قطو لا حول لي ولا قوة الي يحذفني بحصه واللي
يطقني بنعال ، واللي يصرخ علي بقمه رأسه ، ومع ذلك ما استسلم
لوضعي البائس واحاول افهم واتعلم والقط رزقي بالحلال ... لكن
انت ..
- جاسم : أنا اشفيني .
- غانم : اخوي اشفيه .
- القط : انت وياه مثل بعض ، معتمدين على أبوكم يصرف عليكم وعلى امكم
تجهز لكم كل شي وعلى الخدم يرتبون غرفكم ويلبسونكم
ويأكلونكم .. انتو ما منكم فايده لا الحين ولا بعدين .
- جاسم : ما جنه غلط علينا !!
- غانم : جنه جرحنا شوي !!

- انيس : هيه بدر أبله منار جت !!
 ابله منار : السلام عليكم ورحمة الله وبركاته .
 الجميع : وعليكم السلام ورحمة الله وبركاته .
 ابله منار : أسعدتم صباحا ياتلاميذي الطيبين .
 جاسم : معاليه يالقطو يالجلب دواك عندي بعدين . « يعود الى مكانه »

((الأبله تكتب على اللوح الاعتماد على النفس))

- ابله منار : درسنا اليوم ياشطار بيكون عن الاعتماد على النفس !!
 « للآليين » انتوش تسوون هنيه الف مرة قايله لكم تقعدون بره ما
 تدخلون الفصل .
 جاسم : ليش يا أبله يمكن احتاج لهم !!
 غانم : أيه يا أبله ساعات يحكني رأسي من يحكه لي .
 نعمان : حتى راسك تبني من يحكه لك .
 جاسم : عاد انت لو تموت ما اخليك تحك فلافل أخوي .
 أبله منار : لو سمحتوا تفضلوا بره مكانكم مب هنيه الا اذا كنتو ناويين
 تحضرون الدرس للأفادة .
 جاسم : لا لا هاذوله خدام مب طلاب ... روحوا بره ولين احتجت لكم
 باناديكم .
 أبله منار : جاسم درس اليوم يقول الاعتماد علي النفس فضيلة ... ومب
 طبيعي اننا ندرس شي وما نطبقه في حياتنا .
 جاسم : بس يا أبله أنا مب متعود اشتغل !!

أبله منار : اذا المسألة مسألة عادة ، تعود انك تقوم بخدمة نفسك ... الاتكال
على الغير عادة قبيحة يا جاسم « تستدير وتذهب للوح » .
جاسم : هاذي من دازها علينا .
غانم : اكيد نعمانوه الرزيل .
الأبله : منهو الشاطر اللي يذكر لي فائد من فوائد الاعتماد على النفس !!
ايوه يانعمان قول !!

((يقف نعمان وجاسم يسحب الكرسي بهدوء))

نعمان : لما الواحد يتعود يرتب فراشه لما يقوم من النوم ، ويرتب كتبـه
وملابسه ويحل واجباته بنفسه يصير شخص يعتمد عليه ويقدر يحل
اي مشكلة تواجهه في الحياة بسهولة !!
الأبله : ممتاز .. صفقوا كلكم حق نعمان !! ((الجميع يصفق)) تفضل
اقعد يانعمان .
« يجلس دون أن يلتفت يقع ويضحك عليه الجميع تنهرهم
الأبله » .
: اشى عليه تضحكون .. بدال ماتساعدونه وتقولون له ماتجوف شر
تضحكون عليه !! خلاص .. بس ... سكتو !!
« يسكت الجميع عدى جاسم »
: اسكت يا جاسم اسكت .
جاسم : اشمقه تهاويشيني أنا دونا عن المخلوقات كلها ... أنا أش سويت
لج عشان تكرهيني « يتظاهر بالبكاء »

- الأبله : اكرهك ، هالكلمة كبيرة يا جاسم ، ومب حلوه الأطفال يرددونها
بدون مناسبة ، أنا ما اكرهك ولاحد هنيه يكرهك ، ممكن نكره
تصرفاتك .. أعمالك .. بس انت كائنسان ما نكرهك ، بالعكس
كلنا نحبك !!
- جاسم : متأكدة يا أبله .
- الأبله : طبعا يا جاسم .
- جاسم : أخاف مب متأكدة .
- بدر : لا تضيع الوقت يا جاسم وخل الأبله تبتدي الدرس .
- جاسم : شاهده يا أبله هاذيه واحد من اللي يكرهوني .
- بدر : أنا ما أكرهك !!
- جاسم : تكرهني !!
- بدر : ما اكرهك !!
- جاسم : تكرهني .
- الأبله : ما يكرهك ... ليش يكرهك ... اذا اختلف معاك في شي أو ما
اتفق معاك على شي صار يكرهك وانت تكرهه كبر عقلك
يا جاسم !!
- نعمان : يا أبله منار لا تعورين قلبج معاه هاذيه يسوي روحه معقد .
- انيس : هل انت معقد يا جاسم ؟
- جاسم : احترموا نفسكم عاد .. وانت سامع شيقولون عن اخوك وساكت
- غانم : ماقالوا شي يا جاسم ، انت معقد صج !!
- جاسم : « ثورة » سامعه يا أبله ، عاجبج هالكلام يا أبله !!

أبله : لا مب عاجبني ، نعمان انت تقدر تعيش في جزيرة مافيا حد
غيرك .

نعمان : لأ !!

أبله : وانت يا انيس !!

انيس : ما اقدر .. ليش !!

أبله : ولا أنا أقدر ولا أي حد فيكم يقدر .. الحياة بدون ناس نحبهم
ويحبونا نعاونهم ويعاونونا ما لها طعم ولا معنى !! ولا يمكن
نقدر نعيش بروحنا منعزلين عن الناس والعالم بدون صداقة وبدون
حب صح !!

الجميع : صح !!

((اغنية تدور حول الحب والصداقة))

الفصل الثاني

ديكور المسرح يتضمن أشجار وشاطئ البحر ولوحة تمثل السماء ، مع دخول الكشافة نسمع صوت طيور تغرد وصوت امواج البحر كمؤثرات خارجية . تدخل الأبله وخلفها التلاميذ وهم يرتدون ملابس الكشافة وعلى كتف كل منهم عدة التخيم .

- الأبله منار : واحد اثنين واحد اثنين واحد اثنين !!
- أنيس : هيه بدر .. بدر !!
- بدر : ماذا يا أنيس ؟
- أنيس : يبدو أن أبله منار لا تعرف العد من واحد إلى عشرة .
- بدر : لا تصير غبي يا أنيس ، انها تعرف بالتأكد
- أنيس : أذن لماذا لا تقول واحد اثنين ثلاثة أربعة خمسة ستة .
- بدر : ((مقاطعا)) أنت اشفيك !!
- أنيس : اشفيني يا بدر .
- بدر : أثناء التدريبات دائما يرددون واحد اثنين فقط .. هل فهمت !!
- أنيس : لأ .. لماذا يا بدر لا يرددون باقي الأرقام ثلاثة ... أربعة خمسة .
- بدر : اف .. أف ..
- ((تخرج المجموعة بالترتيب ولا يتبقى سوى غانم وجاسم))
- أنيس : «يتبعه» .. بدر .. هيه بدر .. توقف .. لماذا لا نقول واحد اثنين ثلاثة أربعة خمسة ستة .. سبعة .

((يختفي صوته تدريجيا وجاسم وغانم يلهثان من التعب))

- غانم : يا ريتني ماجيت معاكم لو أني قاعد في بيتنا جان الحين مرتاح
وعندي من يخدمني وينفذ كل طلباتي .
- جاسم : يعني أحنأ بكيفنا جينا ما سمعت الربع اشقالو يوم قلنا مب رايعين
معاكم رحلة الكشفة !!
- غانم : أيه قالو انتو كسالى ومب قد المسؤولية ومب كفو .. بس أحنأ أش
علينا من كلامهم .. خل يطلعون اشاعات مثل ماييون ..
- جاسم : المصيبة ياغنوم ان هالكلام مب اشاعات .
- غانم : « بجدية » تفتكر صج !!
- جاسم : أعتقد جذيه !!
- غانم : لا لا مب صحيح .. احنأ كفو ونص وقد المسؤولية ونص ويعتمد
علينا ونص .
- جاسم : زين اش سالفه هالنص بعد !!
- غانم : علي كيفي .. ونص بعد !!
- جاسم : غنوم أنا تعبت .. هلكت .. هالبقشه الي على ظهري هدت حيلي
وطيحت جتفي !!
- غانم باكيا : حرام والله حرام ، أنا ما عاد فيني شده أشيل حتى نفسي .. ليش
ما خليت الخدام يجون معانا ليش .. ليش .. ليش !!
- جاسم : ممنوع .. ما سمعت الأبله ، بيونا نعتمد على نفسنا ..

- غانم : هم اشلهم خص فينا ، ليش حاطين دويهم ودونا ..
- « ينام على الأرض ويضرب برجله باحتجاج ويديه وكأنه طفل »
- ليش : ليش .. ليش !!
- جاسم : قوم ياغنوم قوم لا تسوي في روحك جذيه ... قوم ياخوي قوم ...
- خلاص أنا باشيل عنك بقشتك .
- غانم : « يجلس بفرح » صج والله ..
- جاسم : بس بشرط !!
- غانم : أشرط يا جاسوم .
- جاسم : كم مرة قايل لك لا تكسر أسمي .. قول جاسم .
- غانم : اشمعني انت تقول غنوم .. اذا فتفت اسمي باكسر اسمك .. وشو شرطك يللا اخلص .
- جاسم : أنت تعبان وما تقدر تشيل أغراضك صح !!
- غانم : صح !!
- جاسم : وأنا تعبان وما اقدر أشيل أغرضي صح !!
- غانم : صح !!
- جاسم : خلاص أنا أشيل أغراضك وانت تشيل أغراضي .
- غانم : وليش ما تشيل أغراضي وأغراضك مع بعض .
- جاسم : ما أقدر انت اش فاكروني هرقل !!
- صوت الأبله : جاسم .. غانم .. وينكم !!
- جاسم : زين جذيه جبت لنا الكلام ... يللا قوم ، تحرك ... قوم جايين
- ياأبله جايين ..

((يحملون أغراضهم ويتجهون جهة المكان الذي خرج منه الجميع مع دخول المجموعة من جهة أخرى يتبعهم غانم وجاسم))

- أبله منار : أشرايكم نخيم في هالمكان الجميل .
الجميع : موافقين !!
أبله منار : وقبل ما نبدأ أشرايكم نردد قسم الكشافة !!
((يرددون القسم ثم تبدأ الأغنية ، ونرى خيام تنصب مع الاستعراض وحبال تمد وكل ما يتعلق بإنشاء مخيم كشفي ، الأغنية تدور حول الكشافة والدور الذي يقومون به ، في النهاية تقع الخيمة التي أقامها جاسم وغانم في طرف المسرح ، المجموعة تضحك .. تنهرهم الأبله)) .
أبله منار : اشعليه تضحكون ؟
نعمان : ما يعرفون ينصبون الخيمة يا أبله .
أبله منار : يعني أنت لما نصبت الخيمة لأول مرة نصبتها عدل .
« يطرق نعمان برأسه خجلا » مب عيب أنا احنا نفشل في المرة الأولى العيب ان احنا نياس وما نحاول مرة ثانية وثالثة .
جاسم : « لأخيه » هاذيه الي ناخذه منكم الحكم والنصايح .
أبله منار : أش قلت يا جاسم .
جاسم : ما قلت شي .
غانم : بلى قال .. قال ، قال انكم اذيتونا بالنصايح والارشادات .
جاسم : يافتان أنا ما قلت جذيه ، قلت ما ناخذ منكم بالكبار غير الحكم والنصايح .
غانم : ما قلت لكبار .. هاذي اضافة !!

- جاسم : كيفي عاد أضيف مثل ما أبغي بس أنت عيب تفتن .
- أبله منار : صج الفتنة مكروهه بس انت يا جاسم مامعاك حق .
- جاسم : اشلون ؟
- أبله منار : اقول لك اشلون .. لو أنا مشيت في شارع وبدون ما انتبه طببت في حفرة كبيرة وتعورت وبصعوبة طلعت منها بمساعدة أهل الخير ..
- تفتكر لو سرت في نفس الشارع شاسوي ؟
- جاسم : تنبهيني للحفرة !!
- أبله منار : جميل بس فيه نقطة ثانية أنا مب انانية عشان احتفظ بمعلوماتي لنفسي لازم أنبه الجميع ان في المكان الفلاني حفرة
- خطوا بالكم لا تطيحون فيها .
- غانم : والله يا أبله فيج الخير .
- أبله منار : وانت شتقول يا جاسم ... أو اش تتصرف لو كانت مكاني .
- جاسم : أسوي مثلج يا أبله ..
- أبله منار : بس هاذي يسمونها نصيحة وانتو تكرهون النصايح .
- غانم : لا لا أنا ما اكرهها هو يكرهها « يشير لجاسم »
- جاسم : يافتان أنا ما اكره النصيحة .. بس أتملل منها .
- نعمان : النصايح خلاصة تجارب غيرنا وفيها خير لنا .. وتجنبنا الأخطاء
- اللي وقعو فيها وبدال ما نبتدي من البداية اللي بدوا منها نبتدي من
- النهاية اللي وصلوا لها .
- جاسم : أوه ياشين النصايح في حلجك جنبها حصى .
- أبله منار : جاسم !!
- جاسم : هو اللي بدى يا أبله !! نيستي يوم يعيب على خيمتنا .

- غانم : هاذي أشبلاها كل ساعة وطاحت
« يحاول اقامة الخيمة وتقع في كل مرة »
- نعمان : أنا أسف .
- جاسم : عبالكم الواحد ما يعرف يسوي شي كلشى ، أنا بالعماله مركبها
جذيه عشان تكون سهلة التحضير .
- بدر : اشدعوه شوربه .
- جاسم : حتى انت يابدر .. تراك مب سهل .
- بدر : محد سهل الحين .
- جاسم : أنا أقصد بسهولة التحضير أنها يعني بمب معقدة التركيب يعني
أقدر أفجها في أي وقت بسهولة ...
- أنيس : هيه بدر .. بدر انظر أنها تبدو كالخيمة
« يشير لخيمة جاسم وغانم » .
- غانم : تبدو ، عيل هي وشو .
- أبله منار : يللا يا جماعة ضيعنا وقت طويل في الكلام وللحين وانا أشغال
كثيرة .. بدر وأنيس عليكم بتنظيف الساحة ، نعمان انت وفهد
تجهزون درامات الماي وتجلبون حطب عشان نطبخ عليه ، جاسم
وغانم ..
- جاسم : احنا ممكن نشرف على سير العمل يا أبله ..
- غانم : أشرف بروحك أنا باحط راسي وبارقد .
- أبله منار : مافيه اشراف ولا فيه رقاد ، الكل لازم يشتغل ، حتى أنا وراي
عدة أشغال .
- جاسم : أش مطلوب منا يا أبله .

- أبله منار : تطبخون الغدا وتنظفون كل شي بعد الغدا .
 غانم : احنا كشافه يا أبله مب طبايخ .
 أبله منار : وأنت تحتقر الطباخ !!
 غانم : لأ .. بس ...
 أبله منار : اذا تحتقر الطباخ واللي يطبخون ما يحتاي تاكل .
 غانم : لأ ما يصير .. تبيني أنقرض ...
 أبله منار : خلاص عيل اذا تبني يكون لك حقوق قوم بواجباتك !!

((تتصرف ويجلس غانم بحيرة))

- جاسم : صكت علينا هالأبله !!
 غانم : والله مشكلة أش نطبخ !! أنا ما اعرف اطبخ ولا اغسل مواعين
 ولا انظف شي ، أنا بس اعرف آكل .
 جاسم : وهاذي شويه .. الأكل فن بعد !!
 غانم : الله يجبر بخاطرك يا جسوم .
 جاسم : غنوم !!
 غانم : جسوم .
 جاسم : غنوم احذرك .
 غانم : جسوم لا تحذرنني .

((بدر يمر عليهم ويده مكنسه وانيس في يده سلة يضع فيها الأوراق))

((والزجاجات))

- غانم : هيه شوي شوي ، الغبره دشت في خشومنا .

انيس : هيه بدر من اين يأتي الغبار .

((يخرجان))

غانم : والحل يا جسوم .
 جاسم : رد يقول جسوم .. وبعدين معاك .
 غانم : اجل هالمناقشات العائلية وجوف لنا حل في هالورطة .
 جاسم : لا تشيل هم « ويصفر » يدخل الآليان ، مقدم وحسام برسـم
 الخدمة !!
 غانم : بيه لودرت الأبله بتهأوشنا هي محذرتنا ما نجيب الخدم معانا !!
 جاسم : الأبله الحين مشغولة ومب داريه الا اذا انت بتقول لها .
 غانم : أنا مب فتان .
 جاسم : لا اكرم عليك .. مقدم .. حسام .. يللا اطبخوا الغدا بسرعة !!
 الآليان : حاضر سيدي .
 غانم : جيف بروحه سيدكم قولوا حاضر سيدينا !!
 جاسم : يمه من الحسد !!
 الآليان : حاضر سيدينا !!

((بيدأن بالعمل واحضار الوعاء والأطباق وما يدل على انهما أشعلا النار ويعدان
 الغداء .. جاسم يتمدد ويقرأ في مجلة .. غانم يخرج لعبة من جيبه ويضعها على
 الأرض ويبدأ اللعب ، نعمان يدخل يراهم يعود للوراء يهدوء ولا ينتبهان له .. يعود
 ومعه المجموعة ينظرون خفية ثم يتسللون عائدين))

- جاسم : « ينهض » أش هالطباخ يامقدام ... الريحه مب لي هناك ...
 اصبخ عدل والا باقول حق الوالد يخصم من معاشك .
- غانم : يللا بسرعة قبل لاحد يجي !!
- جاسم : بذاك ماتعطي أوامر روح راقب الوضع .
- غانم : وأنا كل الشغل علي ... انت ما تسوي شي .
- جاسم : « بدهشة » الحين أنت من وصلنا أش سويت !!
- غانم : شلون أشى سويت عبالك أنا قاعد مرتاح ... أنا من ساعة العب
 ماتشوف .
- جاسم : « ساخرا » لا اسمح لي يالأخو والله على بالي قاعد بدون شغل .
- غانم : كله تظلمون الانسان .
- جاسم : لا اسمح لي .. حقتك علي .. « يصرخ » قوم ويلي دلح قوم « يقفز
 غانم مرعوبا » تقص على من انت تقص على نفسك وتصدق
 الجذبه .. قوم جوف الجماعة ..
- غانم : زين لا تصارخ .. « يتجه لطرف المسرح » كله يصارخ وبس وهو
 ما يسوي شي !! مستغل طبييتي وضحكه سني اسوأ استغلال .
- جاسم : انت تتحلطم شتقول ؟
- غانم : « محتجا » اكلم نفسي بعد ممنوع الانسان يكلم نفسه .
- جاسم : كلم نفسك بيه والله والنفس !!
- غانم : لا تعيب علي .
- جاسم : أنا عيبت على نفسك مب عليك .
- غانم : اشوى ... بيه اكوه وصلوا ... قربوا ... ياو ...
- جاسم : « يدفع الخدم بارتباك » يللا .. يللا .. الغدا خالص مب جذيه .

- الآليان : نعم سيدي .
غانم : اش قلت أنا !!
الآليان : نعم سيدينا !!
جاسم : يللا على البيت بسرعة ولين احتجت لكم باضرب بليب .
الآليان : بس احنا ما عندنا بليب .
جاسم : باطلع لكم بعدين المهم روحوا البيت ولين ضربت لكم بليب تعالو ..
يللا روحوا .
غانم : بسرعة يا جاسم !! جاسم بسرعة .. جسوم .
جاسم : غنوم اش قلت لك أنا .
غانم : أقول لك جاسم ما ترد ، تعودت على جسوم .

((تدخل المجموعة وجاسم يقلب القدر وهو يغني بعد ذهاب الآليين))

- أبله منار : السلام عليكم !!
جاسم : عليكم السلام .. هاه خلصتو اشغالكم .
نعمان : نعم خلصنا والحمد لله .. انت اش طبخت لنا .
جاسم : أنا .. طبخت .. غنوم .. اش طبخنا احنا .
غانم : مادري عنهم شى طبخوا ??
أبله منار : عن من تتكلم .
جاسم : عنا طبعا ، بس هو دايمًا يضخم الأمور !! تعال .. تعال منيه .
« يأخذه في زاويه » انت تبني تفضحنا .. ما عندك مخ .
غانم : اسمع عاد ، أنا ما أحب اكذب !! كل شي ولا الجذب .

- جاسم : للضرورة أحكام يا غنوم .
- غانم : الا الجذب ما له ضرورة !! اسمح لي ياخوي .
- جاسم : خلاص خلاص أنا باجذب عني وعنك ، باضحى عشانك ، عاد عسى يبين في عينك ...
- بدر : ماذا أعددت لنا للغداء يا اخ جاسم ؟
- جاسم : أعددت لكم ما لذ وطاب من الأطعمه الجيده الصحية المغذية ... والتي تساعد على بناء الجسم والعقل معا .
- أنيس : أنا احب الخضار ... هل طبخت لنا بعض الخضار ؟
- جاسم : خضار .. ممكن !! « يطل في الوعاء » .
- نعمان : شلون ممكن .. ماتعرف اش طبخت !!
- جاسم : عويذ الله من شرك يا نعمانوه .. بعدين اش لزمه هالأسئلة المهم قمت بالمطلوب مني !! وعلى اكمل وجه بعد !!
- أبله منار : غسلت الخضار والدجاج قبل لا تطبخ !!
- جاسم : وغسلت يدي وويهي بعد وثيابي باغسلها عقب الغدا بعد اش تامرون .
- أبله منار : جميل جدا .. النظافة جزء من الحفاظ على الصحة !!

((أغنية بهذا المعنى مع استعراض لأنواع الخضار وفائدتها وبالإمكان إستخدام

لوحات مجسمة للفواكه والخضروات))

((في نهاية الأغنية يقترب نعمان من الأبله ويحدثها هامسا تشير له بالموافقة

وتذهب لجاسم وغانم ونعمان يتجه للوعاء الكبير ويضع فيه مسحوق أبيض من كيس في

جيبه ثم يبتعد مسرعا))

- أبله منار : يللا يا جماعة نجهز السفره !!
 انيس : أنا غسلت يدي بالماء والصابون .
 بدر : وأنا أيضا !!
 نعمان : وأنا بعد ، بس ما لعبت في الماي مثلكم ، يا أبله اهدروا كمية
 كبيرة من الماي وهم يغسلون يدهم .
 جاسم : ياربي هاذيه اشقد فتان اشلك خص انت .. هاذيه الا ماي
 ومتوفر
 أبله منار : هاذيه نعمه يا جاسم ولازم نحافظ عليها .. هالماي اللي انت ماتعرف
 قيمته فيه ناس يتشفقون عليه ومايحصلونه ، فيه ناس تموت عطش
 وارااضي تمتو عطش ... وغير جذيه الدولة تصرف ملايين عشان
 تحلي الماي ويصير عذب وصالح للشرب والإستعمال .
 بدر : هذا صحيح وأنا آسف جدا !!

((يتحدثون وهم يمدون السفره ويضعون الأطباق))

- أنيس : أين السلطة .
 غانم : اي سلطه انت بعد ، مافيه سلطه .
 جاسم : لا .. أظن فيه .. ايه هذا السلطة .
 نعمان : شلون تظن ...
 جاسم : لا حول الله هاذي قاعد لي على الوحدة والنص ... ييه ما يصير
 الواحد ينسى ... يصير والا مايصير ..
 بدر : اف .. ماهذا الطعام .

نعمان : كله ملح !!
 غانم : أذوق .. بوه ماينكل .
 جاسم : ماينكل .. مايصير .

((يترك الجميع الأكل))

أبله منار : هاذي طباخك يا جاسم .
 جاسم : « بارتباك » لأ .. أنا مالي خص .. أقصد .. مب أنا .
 أبله منار : غانم اللي طبخ .
 غانم : لا ييه أنا ما طبخت !!
 أبله منار : منهو فيكم اللي طبخ !!
 جاسم : شاقول لها الحين .. أنا .. هم .. مادري شاقول .
 أبله منار : قول الصبح !!
 جاسم : الصبح مب أنا !!
 غانم : ولا أنا !!
 جاسم : مقدم وحسام هم اللي ... اللي طبخوا ... بس أنا باروايهم ...
 باسنهم .
 أبله منار : قبل لا تحاسبهم ... حاسب نفسك ... هاذيه الاعتماد على
 النفس اللي تكلمنا عنه يايين رحلة كشافه ويايين الخدم يقومون
 باشغالكم .
 جاسم : غلطة يا أبله .. غلطة ..

- أبله منار : انت غلطت ثلاث غلطات مب غلطة واحدة .. أول غلطة خالفت
القوانين وبيت الخدم يقومون بشغلك ، ثاني غلطة جذبت والجذب
رذيلة مكروهه والغلطة الثالثة انك حطيت اللوم على غيرك من بدال
ما تواجه الموقف .
- غانم : ثلاث غلطات مرة وحده .. بيه هاذي ياخذ فيها إعدام .
- أبله منار : وانت تشاركه في الغلط .
- غانم : أنا ماجذبت .
- أبله منار : بس ما قمت بواجبك مثله بالضبط وتسترت عليه لما جذب !!
- غانم : صحيح يا أبله !! بس المشكلة أن أمنا وابونا ما علمونا نسوي شي ،
كل شي يسوونه لنا حتى واجباتنا المدرسية يحلوونها معانا ...
وساعات يحلوونها لنا .
- أبله منار : والنتيجة انكم تعيشون عالة على المجتمع والعالم كله يتقدم وان مكانا
محللك سر مثل مايقولون .
- نعمان : ليش نرضى نكون أقل من غيرنا !!
- جاسم : من قال ان عندنا علماء كبار ومخترعين .. نسيت ابن سينا
والفارابي وسيبويه وابن بطوطة وابن خلدون وابن عبد الله اللي هو
أنا ..
- أبله منار : ولين متى بنعيش في الماضي ليش ما نجتهد للحاضر ونخطط
للمستقبل .
- أنيس : أنا جائع يابدر .
- بدر : وأنا كذلك .

- أبله منار : يلا عيل ناكل بعض الفواكه ونقوم ببعض الرياضة حتى وقت
العشا !!
- نعمان : العشا أنا اللي باطبخه يا أبله !!
- أبله منار : اتفقنا .. يلا يا جماعة .. واحد اثنين واحد اثنين ..
- جاسم : يلا يا غنوم .
- أبله منار : لأ .. أنت وغانم أكلو اللي طبخه غيركم .
- غانم : ماينكل يا أبله .
- أبله منار : احصدوا مازرعتو ... وعلى فكرة لا تتحركون من المخيم عشان
عليكم الحراسة .

((يخرجون))

- أنيس : ثلاثة أربعة .. خمسة .. ستة .. سبعة ..
- جاسم : أنا مفتشل من نفسي !!
- غانم : أنا ميت من اليوع .
- جاسم : صحيح يا غانم .. احنا ليش نرضى غيرنا يكون أحسن منا ..
- غانم : اقول لك انا يوعان .. يوعان !!
- جاسم : شلون لك نفس تشتهي الأكل بعد الموقف اللي صار لنا .
- غانم : انا .. يمه .. وشوذي !!

((يدخل رجل ملثم وفي يده عصي ويصرخ))

- الرجل : أنا الحرامي .
- غانم : خرعنتني .. يا أخي .. شلون تدخل المخيم لا احم ولا دستور .
- الرجل : انا الحرامي الخطير .
- غانم : « يمد يده بسذاجه » وأنا غانم عبدالله .. اشلونك .. عندك شي ينكل .
- جاسم : وخر يا غانم .. يقول لك حرامي تسلم عليه .
- الرجل : السلام علي ويه الله .. اشفيتها لين سلم !!
- جاسم : والله طيب هالحرامي ..
- الحرامي : لا تطولها وهي قصيره طلعو كل الأشياء الثمينه الي عندكم ...
- فلوس .. ذهب .. سندات .
- جاسم : عبالك داش بنك انت .. ماعندنا شي من الي ذكرته .
- غانم : عندنا أكل كله ملح انجب للك .
- الحرامي : هيه ... هيه ... أنا مب طنازة لكم ... ديروا بالكم ترى ممكن أأذيكم .
- جاسم : لا تأذينا ولا نأذك .. ييه ماعندنا شي ينباق .. وبدال ماتبوق وتعرض حياتك للخطر روح دور لك شغله شريفه أحسن لك .
- الحرامي : لا ويعطي نصايح بعد .. « يرفع العصا » رفعوا يدكم والا ثورت فيكم .

((غانم يمسك طرف العصا بفضول))

غانم : العصا تثور .. فيها رصاص .

- جاسم : « يسحبها منه » أجوف .. هاذي عصى عادية ..
- الحرامي : هات العصى أحسن لك !!
- جاسم : يا حرامي لا تضع وقتك ، قلنا لك ما عندنا شي ينسرق .
- الحرامي : الخيام والمواعين ولثياب .. لفوا كل هالأشياء .. بسرعة تحركوا .
- جاسم : آسفين !!
- غانم : اذا تبي شي خذه بنفسك احنا مب عبيد أبوك .
- جاسم : اشبلاك انت .. شنو ياخذه بنفسه ... لا ياخذه ولا نعطيه هاذي
- امانة .. واحنا نحرس الأمانة .
- غانم : ايه صحيح .. صحيح !!
- جاسم : « يدفع الرجل » يللا روح .. اليوم سمعنا حجي يغث بما فيه
- الكفاية وما عندي استعداد اسمع كلام من تحت راسك .
- الرجل : لا تدز .. أنا الحرامي .. ولازم تخافون مني وتنفذون طلباتي .
- جاسم : أنا ما اخاف الا من ربي .. قابض علي الحرامي والحرامي .. وشنو
- يعني انسان حالك حالنا مع فرق كبير طبعا !!
- الرجل : وشو الفرق .
- جاسم : ان احنا ما نخذ شي مب لنا .. مب حراميه يعني .
- الرجل : انا مب متحرك من هنيه قبل لا اخذ الخيام وكل الأشياء اللي
- ذكرتها .

((يحاول أن يضع بعض الأغراض في الكيس الذي معه يهجم عليه جاسم))

جاسم : ما اسمح لك لو على قص رقبتني .. ساعدني يا غانم !!

غانم : الهوب هوبك يا جاسم .

((يتعاركان معه مع موسيقى مناسبة ثم يكتفانه مع دخول المجموعة))

- أبله منار : منهو ذيه !!
- غانم : حرامي ... يبي يبو قنا يا أبله .. وأنا وجاسم عطناه درس عمره ماينساه .
- نعمان : واجهتو الحرامي وما خفتو .
- جاسم : يخاف اللي مسوي شي غلط .. بس اللي على حق اشله يخاف .
- أبله منار : والنعم فيكم والله .. نعمان .. روح ناد الشرطة !!
- الحرامي : ما في داعي للشرطة .. سامحوني .. حقكم علي .. حرام عليكم .
- أبله منار : اللي يعرف الحرام مايوق ... ودوه ... ربطوه في الشجرة لين تجي الشرطة « يسحبه البعض للخارج وهو يستغيث »
- اهنيكم على شجاعتكم يا جاسم ويا غانم ... انتو الحين اثبتوا انكم رجال ممكن الوطن يعتمد عليكم .
- جاسم : وأنا اعتذر عن الأغلاط اللي ارتكبتها اليوم وباحاول اتجنبها من هاللمحظة ورايح .
- أبله منار : مدام جذيه عيل اسمح لي اقول لك ان احنا اللي حطينا الملح في الأكل .
- غانم : انتو .. ليش !! ليش .
- أبله منار : لأنكم خالفتم قوانين الكشافة ، وحبينا نعطيك درس تتعلمون منه شي يفيدكم !!

بدر : انشالله ماتزعلون منا يا أبطال .

((الجميع يحيطون بهم ويصافحونهم بمودة))

جاسم : « بفرح » اشكركم على هالدرس !! ومب زعلان ، بالعكس أنا

سعيد .. أول مرة أحس اني فخور بنفسي واني ممكن اكون نافع !!

غانم : وأنا بعد .. بس المشكلة اني يوعان .

((يضحكون))

نعمان : ولا يهمك .. باسوي لك عشا عمرك ماتتساه .

أبله منار : فيه حاجة مهمة نسيت اقولها لك يا جاسم .

جاسم : شنهني يا أبله .

أبله منار : انت اثبت لنا اليوم انك شجاع ويعتمد عليك .. وياريت تترك عنك

لظنازه وما تستخف بغيرك !! لأن كلنا مثل بعض !! وما فيه حد

أحسن من حد الا بعمله !!

جاسم : كلامج صحيح ميه في الميه ، وحقكم علي كلكم حتى انت

يالفتان .

نعمان : هاه ...

جاسم : اوه .. المسامحة .. نسيت .. حقك علي يانعمان .. ومثل ما قالت

الأبله كلنا مثل بعض وكلنا عيال حوا وآدم ... وما فيه حد أحسن

من حد الا بعمله !!

((النهاية : أغنية حول هذا المعنى))